

Die Weihnachtsplätzchen

Dobler: So, griäß Gott, Frau Meier. Des is schee, dass Sie heit Zeit hamm. Göld hamma, Übergwicht hamma, owa koa Zeit hamma, hahaha! Jetza sitzns Eahna her, nacha ratschma a weng. Geh, Oma, ruck aaf d'Seitn, dass d'Frau Meier an Plotz hod!

Meier: Bin so frei! Es geht scho. D'Oma braucht ned rucka wega mir. Bleibns no sitzn, Oma!

Dobler: So, nehmans Eahna ruhig daweil a Plätzl, Frau Meier. Da Kafä is glei durch. Wenna durch is, nacha bringen glei.

Meier: Mei, scheene Plätzln hamms, Frau Dobler. Wunderbar. So farbenfroh. I sog awl: „'s Auge isst mit!“ Aa beim Plätzl.

Dobler: Do hamm Sie recht, Frau Meier. Mei, i hob holt bacha, wosma normal aso bacht: Bärnpratzn, Zimtsterne, a Mognbrout, Kokosheiferl. Dann no so zampicke, i woäß momentan gor ned, wia de hoißnd, i miaßert direkt im Kochbuch nochschaun. Owa guat sans. Probierns amol a sechas!

Meier: Bin so frei! Mmmm ... wunderbar! Do brauches Rezept, unbedingt! Mei, Sie miaßn de naxtn Dag amol zu mir kemma, nacha kinnans meine aa probiern. Lacht: Bevor dass mei Mo alle verdruckt. Der Mensch is unmöglich.

Dobler: A geh!


Meier: I sogs Eahna. I muaß de Plätzln guat verstecka, ganz guat! Wenn i de Plätzln ned dermaßen guat verstecka daad, hättma mir scho am Zwoatn Advent koi mehr. Der Mo wenn Plätzln segt: Ungelogen - Stuckara zwanzge aaf oamol. Der konnse nimmer bremsn. I sog awl, des is direkt aso a Art Sucht. Owa do locht er bloß.

Dobler: A geh! Jamei, wenna eam holt schmeckt. Schauns, mei Paul, der is jetza scho siem Jahr dout, der isst praktisch scho lang koa Plätzl mehr. I wollt, er aaß no oans. Weinerlich: Omei, mei Paul!

Meier: Do hamms recht, Frau Dobler! Eahna Paul, des war a feiner Mann! Sie, Eahnane Kokosheiferl, de san aa ned schlecht!

Dobler: Gellns, Frau Meier, des sogn Sie aa. But-ter-weich!

Meier: Ja, wirklich, ganz guat. Also, verstengas mi ned falsch,



wirklich guat sans. I persönlich, i moch owa d'Kokosheiferln mit mehr Biss. Mehr so kross. Dass kracht, wennma einebeißt. Wissens, wos i moin, Frau Dobler? Mehr so, so mit Biss. Kross holt.

Dobler: I woäß scho, wos Sie moina, Frau Meier. Owa i hob von an Kokosheiferl a andere Auffassung. Nix für unguat, owa a Kokosheiferl muaß woach sa. Des derf ned splittern, sondern des muaß direkt z'geh beim essn.

Meier: Me, de oan sogn aso, de andern sogn aso. Im Prinzip is o wurscht. I moin, wer kann des scho genau sogn, ob jetza a Kokosheiferl mehr kross oder eher woach sei soll. Des kannma ganz schlecht sogn. Vielleicht is des aa regional verschieden. Wissen kannmas ned.

Dobler: Wissens wos, Frau Meier? Jetza frongma d'Oma, wal de is a Hausfrau der alten Schule. Zur Oma: Wos sagst jetza do du, Oma, muaß a Kokosheiferl mehr woach sei oder mehr kross?

Oma: Ha??

Dobler Laut: Dei Meinung möchtma wissen: Muaß a Kokosheiferl mehr kross sei, also mehr hirt, oder mehr woach?

Oma Zahnlos: Des is mir wurscht! I muaß eh alls eibrocka!

(Toni Lauerer)